

Երեւում էր, որ Ծովիկը խնձորի ծառից տեսել էր ինձ: Վերադառնալով պարտիզից, մի զամբիւղի մէջ բերեց ինձ համար մրգերի ամենաընտիր տեսակներից եւ, ամբողջ զամբիւղը դնելով իմ մօտ, ասաց.

– Որից որ սիրում ես, նրանից կէ՛ր:

– Բոլորը լաւ է, քո քաղածը վատ չի լինի, – պատասխանեցի ես, նայելով ուղիղ նրա արեւի ջերմութիւնից շառագունած երեսին:

Նա ժպտաց եւ հեռացաւ, երբ նկատեց, որ Ասլանը վերադարձաւ իր հօր հետ:

Տեսնելով իմ մօտ դրած զամբիւղը, նրա հայրը ասաց ինձ.

– Դուք, փոքրիկներդ, աւելի բախտաւոր էք մեզանից, որ աշխարհի դարդերը չէք հասկանում...

Յետոյ նա դարձաւ դէպի Ասլանը:

– Տեսնո՞ւմ էք, ինչպէս ջահելները միմեանց յարգել իմանում են. այդ պտուղները անպատճառ Ծովիկի քաղածը պետք է լինի:

Նրանք մտան սրահի մէջ բացոող դռնից եւ երկար ժամանակ մնացին ներսի սենեակներում: Երբ Ասլանը դուրս եկաւ, նրանից հարցրի:

– Ի՞նչ կար այնտեղ:

– Մի հիւանդ կար... – պատասխանեց նա, էլ չխօսեց:

### Թ. ԳԻՇԵՐԸ ԱՄԱՆՑ ԳԻՒՂՈՒՄ

Երեկոյեան դարձեալ բոլորը հաւաքեցան սրահի մէջ: Ասլանը նստած էր իր մինդարի վրայ, վարպետ Փանոսը նրա մօտ, ես իմ տեղում, իսկ տան տերը երբեմն նստում էր, երբեմն կանգնում էր, երբեմն գնում էր իր մարդիկներին զանազան պատոներներ տալու:

Փայտեայ բարձր աշտանակի վրայ դրած էր մի խեցեղէն ճրագ, որը աղաւնու նմանութիւն ունէր. նրա միջում կտաւատի ձէթ էր լցրած, իսկ կտուցից դուրս ընկած պատրոյգը հանդարտ վառռելով տարածում էր աղօտ, կանաչագոյն լոյս իր շրջակայքում: Ձէթից եւ մրից բոլորովին սեւ գոյն էր ստացել այդ աղաւնին:

Խօսակցութիւնը գլխաւորապէս ծովակի մասին էր: Խօսում էին նրա թեւաւորութեան վրայ, արդեօք նա խաղա՞րդ է, թէ անհանգիստ, տարոյայ ո՞ր ամիսներում սովորաբար պատահում են ալեկոծութիւններ. խօսում էին նաւահանգիստների մասին, թէ ո՞ր կողմերի կամ ո՞ր եզրերի մօտ են գտնւում,